

# NZAMBE AYÉBANAKA

## NA BILEMBO NA YE



Tata na Likolo, totondi Yo mpo na litomba ya kokamba biso lisusu awa, na Beaumont, Texas. Wana nazali kobwaka miso na ba-balcon oyo, nazali komikanisela ba-ntango oyo tozaláki awa liboso, pe makambo minene Osáláki; na ntembe te, mingi na bato yango bazali awa na mpokwa oyo. Soki Ósimbáká nzoto na bango ya bokono te, balingaki kozala awa te na mpokwa oyo, kasi Osáláki yango, pe bazali awa. Bikaniseli mingi ezali naino na makanisi, nyonso wana ekozala elongo na biso kino Seko-na-Seko.

<sup>2</sup> Tobondeli ete Ópesa biso kosopana monene ya Molimo. Pambola biso elongo. Pambola losambo moko na moko, mondimi moko na moko.

<sup>3</sup> Pe, Nkolo, pambola na lolenge na ye moko ndeko na biso elenge molingami, Ndeko Pearry Green, oyo ayei liboso mpo na komeka kotatola Likambo oyo. Tika ete bato ya—ya engumba kitoko oyo bámona mpo—mposa oyo elenge mobali oyo azali na yango mpo na bato awa, mpo na komema bango na Klisto oyo ye alingaka. Azali komeka kokotisa lotómo nyonso oyo akanisi elongobani, oyo asili kotála malamau na nzela ya Liloba, pe alingi komona bato kobikisama.

<sup>4</sup> Sunga biso, Tata, na makasi na biso, wana tomipesi epai na Yo mpo na mosala, mpo na lokumu pe nkembo ya Nzambe. Tosengi yango na Nkombo na Yesu. Amen.

<sup>5</sup> Sikawa, biso tóbosana te, na mpokwa nyonso sikawa, bómema moto moko elongo na bino, bózua telephone, bóyebisa moto moko, pe bóyebisa mokengeli nyonso, lingomba nyonso. Ézala likambo nini, ata soki bandimaka lokola biso te, ntango nyonso bokoki koya, bófanda, bóbika malamau pe bózala na bolamu, tosepelaka mpenza kozala na bino awa.

<sup>6</sup> Pe sikawa, bómema Biblia na bino, bómema ekomeli, bókoma biteni ya makomi. Bókende koyekola yango, kokokanisa yango na Liloba mpo na koyeba soki ezali sóló to te. Bomoni? Na bongo, bózua líkindo ya bino moko te, bózua yango ndenge ekomámi na Biblia. Bomoni, mbala mingi, tokoki koloba: “Elingi koloba *boye*, Likambo yango elingi koloba *boye*.” Nzambe azali na ntina ya molimboli moko te, Alimbolaka Liloba na Ye moko. Bomoni?

<sup>7</sup> Nzambe alobaki: “Tika póle ézala,” pe póle ezalaki. Yango ezalaki na ntina—na ntina ya ndimbola moko te. Ye . . . Esalemaki

bobele ndenge Alobaki. Alobaki: “Mongondo akokumba zémi,” pe akumbaki yango. Yango ezali na ntina ya ndimbola moko te.

<sup>8</sup> Nzambe alakaki makambo mosusu esengeli kokokisama na eleko oyo! Alobaki yango, na bongo, ezali na ntina ya ndimbola moko te. Nzambe alobaki bongo, pe Alimbolaka yango Ye moko, yango wana Biblia elobi ete Ezali na ntina ya kolimbolama na moto moko te. Nzambe alimbolaka Liloba na Ye moko na kokokisa Yango.

<sup>9</sup> Sikawa, nazali komituna soki tokoki kotelema, wana tozali kotánga Liloba na Ye, na Buku ya Baebete, mokapo ya 1. Ntina nasengi bino kotélema, ezali mpo na kopesa lokumu ya Liloba oyo. Nandimaka ete Liloba ezali Nzambe, “Na ebandeli Liloba ezalaki, Liloba ezalaki elongo na Nzambe, pe Liloba ezalaki Nzambe. Pe Liloba ekómaki nzoto pe efandaki elongo na biso.” “Yesu Klisto motindo moko lobi, lelo, pe libela,” yango nde mama-na-likambo ya ba-campagne na biso. Yango wana, ntango totángaka Makomi na Ye moko, kati na Liloba oyo, awa, totelemaka. Ntango tolakaka bosémbo na ekólo liboso na bendéle, ntango bendéle na biso ematisamaka, totélemaka mpo na kopésa lokumu na bendéle na biso, ekólo na biso, tosengeli kosala yango. Na bongo, koleka boni tosengeli kotélema ntango tozali kotánga Liloba ya Nzambe! Baebete 1:1-3, wana tozali kotánga.

*Nzambe, oyo na ntango ya kala, azalaki kosolola na batata na nzela na basakoli mbala na mbala pe na ndenge mingi,*

*Na mikolo oyo ya suka alobi na biso na nzela na Mwana na ye, oyo ye atii ye mosangoli na libula na biloko nyonso, pe na nzela na ye azalisaki mikili;*

*Ye azali kongenga na nkembo na ye, azali pe elilingi etalisami na ye mpenza, pe azali kolendisila biloko nyonso na liloba ya nguya na ye, esili ye kopetola masumu na biso, afandi na loboko ya mobali ya Nkembo kuna na likolo;*

<sup>10</sup> Tóbondela. Bato boni sikawa, wana togumbi mitó pe mitema, balingi ete tókanisa bango na libondeli, mpo, kati na liyangani oyo, esika moko, Nzambe ákokisa bosenga na bino? Bótómbola bobeles maboko. Nkolo amoni maboko na bino.

<sup>11</sup> Tata na biso ya Likolo, na ntáká ya komoma ya miso na ngai ya bomoto, ezali na maboko etondi bisika nyonso. Na bosóló, emoniseli ya Ndeko Green ná mposa na ngai ya koya ezalaki malamau. Sikawa, Tata, kokisa mposa na bango, kokokana na Liloba na Yo pe elaka na Yo. Totiki bango na maboko na Yo. Pe tika ete bomoi na biso élongobana mpenza na Liloba, kino Liloba ékóma nzoto elongo na biso, pe épesa bato kondima ya kozua na ebómbelo na bango na Likolo, makambo oyo Yesu asilá kotielá bango eleki ntango molai, mpo na masumu pe bokono

na bango, wana bazali na mobembo. Pambola biso sikawa, tobondeli, wana tozali kotalela Yo mpo na komonisa biso Liloba na Yo, pe kokómisa Yango nzoto elongo na biso. Mpo tosengi yango na Nkombo na Yesu. Amen.

Bokoki kofanda.

<sup>12</sup> Sikawa, nakosenga bino, soki bokolinga komeka kosala makasi, bótambola-tambola te, nalingi koloba, kotélema pe kokende, liboso na miníti ntuku minei na mitano to ntuku mitano ekolanda, eloko moko ya bongo. Sikawa, e—eloko . . .

<sup>13</sup> Likambo ezali boye, tolingi koyeba eloko nini Sóló ezali. Pe Sóló bobele moko oyo ngai nayebi, ezali Biblia. Sikawa, mokolo moko Nzambe akosambisa mokili, tondimaka yango, pe moko na moko na biso bato na mokili tokomemama Liboso na Ye mpo na kosambisama. Nakomaki makambo mosusu awa, ná Makomi oyo nakolobela na miníti moke.

<sup>14</sup> Sikawa, bómikanisela, na mpokwa oyo, soki nasengeli kotuna motuna: “Mo-katoliko moko azali awa?”

“Iyo,” bakoloba. Pe ntango mosusu . . .

“Ee, Nzambe akosambisa mokili na eloko nini?”

Bakoloba: “Na lingomba Katoliko.”

<sup>15</sup> Na bongo, nakotuna lisusu: “Lingomba Katoliko nini?” Bayokanaka te. Bayokanaka te na makambo mingi. Moko ezali ya ba-Roma, mosusu ya ba-Grek, ya ba-Orthodoxe pe bongo na bongo. Tozali na yango ebele. Soki nalobi . . .

<sup>16</sup> Ba-Methodiste bakotelema mpo na koloba: “Akosambisa yango na lingomba Methodiste.” Ee, soki ezali bongo, na bongo, ba-Batiste bakolóna te. Pe soki basambisi yango na ba-Batiste, na bongo, ba-Methodiste bakolóna te.

<sup>17</sup> Mpo, bómikanisela, koloba Liloba moke moko mabé, bobele moko (mobimba na yango te, mobimba ya molongo moko te), bobele iota moke ya kozanga kondima Liloba, ebótaki kufa nyonso, bokono nyonso, mpasi nyonso. Oyo wana ezalaki Eva, na elanga ya Edene. Sikawa, soki nyonso oyo ebótaki makambo yango, bobele mpo mwasi moko asósólaki Liloba mabé . . . A—asalaki yango na nkó te, “apengwisamaki,” Biblia elobi yango. “Apengwisamaki,” kokokana na Liloba, yango ebótaki makambo nyonso oyo, na bongo, ngai na yo tokozonga ata moke te zángá kozala na Liloba mobimba.

<sup>18</sup> Sikawa, nandimi likambo Biblia elobi ete Akosala yango te, nandimi te ete Nzambe akosambisa mokili na nzela ya lingomba Pantekotiste, Methodiste, Batiste, to Katoliko. Akosambisa yango na nzela ya Yesu Klisto, Alobaki bongo. Pe Klisto azali Liloba, “Na ebandeli Liloba ezalaki, Liloba ezalaki elongo na Nzambe, pe Liloba ezalaki Nzambe. Pe Liloba ekómaki nzoto pe efandaki elongo na biso. Motindo moko lobi, lelo, pe libela.”

<sup>19</sup> Mobimba na yango ezali Seko-na-Seko monene. Seko-na-Seko ebandá ata moke te pe ekoki kosuka ata moke te. Yango wana, kati na Seko-na-Seko monene oyo, ezalaki na misala, ya kozala Tata, kozala Mwana, kozala Mobikisi, kozala Mobikisi-bokono, pe makambo nyonso oyo ezalaki kati na Ye. Pe eloko se moko ezali kosalema sikawa, ezali kotalisa misala na Ye. Esili.

<sup>20</sup> Sikawa, ba-nkombo na biso ekomamaki na Buku na Bomoi ya Mwana-mpate liboso mokili ézalisama. Pe ntango Liloba ebeti yango, soki pole moko ezali kuna, oyo ebongisámá mpo na Bomoi, Yesu alobaki: “Moto moko te akoki koya epai na Ngai soki Tata na Ngai abendi ye te, pe baoyo nyonso Tata na Ngai apésá Ngai bakoyá epai na Ngai.” Na bongo, bomoni, ezali Liloba, ntango nyonso, Liloba, Liloba.

<sup>21</sup> Sikawa, na mpokwa oyo, nalingi kolobela likambo oyo, longwa na eteni touti kotánga, nakozua mokónza oyo: *Nzambe Ayébanaka Na Bilembo Na Ye*.

<sup>22</sup> Sikawa, pene na makambo nyonso tomonaka ekoki koyévana na bilembo na yango.

<sup>23</sup> Sikawa, tomoni, ndakisa, banyama, soki ozui, ndakisa, bandeke. Sikawa, soki ozui, ndakisa, nde—ndeke-motáne-mosáká, ntango epumbwaka, pe ndeke-ya-zámbo, bakokanaka mingi mpenza. Kasi mpo na koyeba ndeke-motáne-mosáká, yango ebétaka mapapu pe ekitaka, na sima emataka pe ekitaka, komata pe kokita. Yango nde elembo. Soki otali malamau, ndeke-ya-zamba epumbwaka mingi na molongó sémba.

<sup>24</sup> Bótala malamau ndeke-nkánga ntango eyáka, nkánga-ya-Virginie, ndenge epumbwaka. Bótala nkánga ya malamau ntango eyáka, bino bato-ya-bokila. Bomoni, ekeseni. Bótala malamau ndeke-ya-monoko-molai ná ndeke-ya-mai, elembo etalisaka eloko nini yango azali.

<sup>25</sup> Mpate ya monene oyo ateleme na ngámbo ya ngómbo, soki epési mokongo, eteni ya sima ya loketo ezalaka pémbé, eteni mosusu ezalaka moindo moke. Soki boyebaki bilembo ya mpate yango te, ekokaki kozala mbuli. Bomoni? Bomoni, bosengeli koyeba bilembo na bango, mpo na kosósóla eloko nini yango ezali pe eloko nini yango ezali te. Tokoki kobakisa makambo mingi mpo na kolobela banyama.

<sup>26</sup> Na boye, tokómi epai na bato, bilembo kati na mobali pe mwasi. Bokeseni ezali. Bango nyonso mibale bazali bato, kasi bilembo ya nzoto na bango mibale ekesenisaka bango. Eleki ntango moke, nazalaki kotánga moko na makambo oyo mwasi-mokonzi amemélaki Salomo mpo na ko—komeka ye, ezali été alatisaki basi mosusu lokola mibali. Pe Salomo aséngaki bango kotámbola pe kosála makambo mosusu, nokinoki, alobaki: “Baoyo bazali basi.” Bomoni, mpo akokaki koyeba na esaleli na bango, ete bi—bilembo na bango ezalaki basi. Eloko moko

esalaka ete okoki kobóm̄ba yango te, ezali—ezali mwasi mpo bi—bilembo na ye etálisaka ete azali mwasi.

27 Ezali lokola loboko ya mobali ná loboko ya mwasi mpo na bato. Bango mibale bazali bato. Soki otáli malamú, moko na bango asáláka mmakambo na loboko ya mobali pe mosusu na loboko ya mwasi. Bótala ndenge bilembo na bango ekesenisaka bango, okoki koyeba soki basalaka makambo na loboko ya mobali, to na loboko ya mwasi to te. Bomoni? Ata bongo bango mibale bazali na maboko, maboko nyonso mibale ekokani mpenza, ekokani mpenza.

28 Nakoki kokótisa likambo moko moke awa. Yesu alobaki, na Matai, mokapo ya 24, ete “na mikolo ya suka, milimo yango mibale elongo ekozala mpenza pene kino ekopengwisa ata baponami, soki ekokaka.”

29 Sikawa, ezali lokola kotála loboko ya mobali ná loboko ya mwasi. Nyonso mibale ezali na misapi minene, misapi, manzáka, misapi mike, misapi ya kati-kati, pe bongo na bongo, mosapi moke koleka, misapi yango nyonso ekeseni. Nyonso mibale ezali na ba-nzela ya misapi minene, bobele moko etali ngámbo moko pe moko ngámbo mosusu, nyonso mibale ba-nzela yango moko, esálémi motindo moko, ba-nzela ya misapi minene. Makambo nyonso ezali komonana ndenge moko, bokeseni moko ezali elembo na yango. Moko ezali loboko ya mwasi pe mosusu ezali loboko ya mobali, yango nde bokeseni se moko.

30 Pe lolenge wana nde milimo ekozala na ntango ya suka, ekozala bongo, kasi bilembo na yango ekotalisa polele soki euti na Nzambe to te. Moko na yango ekozala solo pe mosusu ekozala lokuta, bokoyeba yango bobele na elembo ya Nzambe. Ezali mpenza bongo, ekosengela kozala bongo. Kasi loboko ya mobali, tokoki koloba “malamu”, pe loboko ya mwasi ekoloba “mabé”, bomoni, moko to mosusu, moko na yango. Ezali koyébana polele na bilembo na yango. Bokoki koyeba yango bobele na elembo na yango.

31 Lokola Yisalaele, na mobembo na bango, ntango bautaki na Ezipito. Sikawa, Nzambe azalaki elongo na Yisalaele, Atálisáki bango elembo moko ya monene kuna, Atindeláki bango mosakoli pe Amonisaki Liloba likomami na Ye. Pe ntango Abimisaki bango, tomonaki elembo na Ye, lolenge Akutanaki na Móse, makambo nini Asalaki. Pe wana...na kati na mobembo, bakutanaki na ekólo mosusu, ezalaki Moába. Pe Moába ezalaki ekólo monene, kasi, bapakano te, ata moke te. Bazalaki bana ya mwana-mwasi ya Lota, pe bazalaki bandimi. Sikawa, bótala bikólo mibale yango. Moko na yango ezalaki ekólo eyébanaki, mosusu ezalaki bobele baleki nzela. Na bongo, bakómaki esika moko, oyo ekólo monene ya Moába etelemaki mpenza kati-kati na nzela na bango ya etinda, ya kokende na mboka ya elaka. Sikawa, bazalaki na . . .

<sup>32</sup> Bótala bi—bikólo yango mibale, moko na moko na bango ezalaki na mosakoli. Moko na bango azalaki molakisi monene pe mosakoli Baláame. Oyo mosusu azalaki Móse. Sikawa Baláame akitaki kuna . . . mpo na kolakela Yisalaele mabé.

<sup>33</sup> Pe, bótala malamú, bango nyonso mibale bazalaki mpenza bato na mobókó. Mosakoli, bato na mobókó ya Baláame, alobaki: “Bótongela ngai bitumbelo nsambo,” ezali mpenza motángo ya Nzambe. “Pe bópésá mbeka ya peto, ngombe mobali, likolo na etumbelo moko na moko,” ezalaki mpenza mbeka yango moko bazalaki na yango na moláko ya Yisalaele. Pe alobaki: “Likolo na etumbelo moko na moko, bópésá pe mbeka ya mpate mobali,” ezalaki kotalisa boyei ya Klisto. Pe kuna, na ngámbo ya Yisalaele, bazalaki kopesa mbeka ya motindo moko.

<sup>34</sup> Bitumbelo yango moko, Nzambe yango moko, kasi moko na bango azalaki na libunga, pe mosusu azalaki na sóló. Na bongo, ezalaki na lolenge se moko mpo na koyeba nani azalaki . . . Na kotala na mobókó, mpo na oyo etali Liloba, bango nyonso mibale bazalaki na sóló. Kasi, bomoni, moko na bango, mposa na ye ezalaki mabé, azalaki koluka kobimisa ndeko na ye na molongó ya elaka oyo Nzambe apésáká ye.

<sup>35</sup> Eloko mosusu, oyo wana, mosakoli Baláame, azalaki moto na mobókó, kasi mosakoli Móse ayébanaki na bilembo ya Nzambe. Likonzi na Móto ezalaki kuna, Pole ya kokamwa etelemaki likolo na bango. Pe kobikisama minene ya bokono ezalaki na moláko na bango, Nzambe ya kokamwa azalaki kotalisa bilembo ya kokamwa. Pe bazalaki kokangama mpenza na Liloba ya elaka, oyo Nzambe apésáká na Abalahama, ntango oyo bikólo nyonso mibale ebandaki. Kasi, sikawa, Móse azalaki na elaka ya Abalahama, mpo na kokende na mboka ya elaka. Baláame, ye pe mosakoli ya Yawe, atelemaki kuna. Pe lolenge bobele moko ya koyeba bango, ezalaki na mobókó ya malakisi na bango te, kasi na elembo ya Nzambe.

<sup>36</sup> Ezalaki na lokito ya ko—kogánga ya mongongo ya Mokonzi awa elongo na Yisalaele. Mbondi ezalaki kosala mosala, Nyoka ya Motako, Libánga libétami. Pe Nzambe azalaki elongo na bango, komitalisa Ye moko kati na Pole ya kokamwa, pe kobikisa bokono pe maládi na bango, ezalaki bango na mobembo. Bilembo ezalaki kotalisa polele eloko nini Ye azalaki, elongobanaki na Liloba ya eleko wana, mpo na eleko oyo bazalaki kobika na yango. Bilembo ya Nzambe ezalaki kotalisa Ye elongo na Móse. Bomoni, bilembo ya Nzambe etalisamaki ná Móse. Likonzi na Móto, mbondi ezalaki kosala mosala, makambo ya kokamwa, Libanga libetamaki, pe bango . . . ná Nyoka na Motako, etalisaka kobikisama ya bokono, pe lisusu—lisusu, bazalaki na nzela ya etinda na bango, ya elaka na Nzambe.

<sup>37</sup> Lisusu, bilembo ya Nzambe ezali ya mokili oyo te. Elembo ya Nzambe ezali eloko ya kokanwa, mpo Azali Mokeli. Azali Oyo-

ya-kokamwa. Pe ntango elembo ya Nzambe ebandi komimonisa, ezalaka mpenza libanda na momesano mpo na makanisi ya bato ya eleko wana, kino ebimisaka bango na nzela. Bakoki kososola Yango te, ata bongo Akendeke ata moke te mosika na bilaka na Ye. Nzambe, na bileko nyonso, ndenge nalobaki, apésaka eteni ya Liloba.

<sup>38</sup> Tózua ndakisa moko. Ezalaki na Yosèfe, mobali ya Maria. Sikawa, abazalaki mobandami ya elenge mwasi oyo, pe basengelaki kobalana. Kasi, liboso bákóma kofanda esika moko, akumbaki zemi ya mwana na nzela ya Molimo Mosantu.

<sup>39</sup> Sikawa, biso nyonso tondimaka yango, soki tozali Baklisto. Tosengeli kondima yango mpo na kozala Moklisto. Ezali Biblia. Osengeli kondima Liloba nyonso ya Biblia, mpo na kozala Moklisto. Sikawa, soki Molimo Mosantu ezali *awa*, na kati, Ekoloba “amen” na Liloba nyonso pe na elaka nyonso.

<sup>40</sup> Mpamba te, sikawa, Yosèfe azalaki moto sémbó, azalaki moto malamú. Na ntembe te ete Maria ayebisaki ye boyei ya Gabriel, pe lolenge nini Molimo Mosantu ekozipa ye, pe asengelaki kokumba zemi pe kobota Mwana-mobali, pe Nkombo na Ye ekozala “Yesu”, lolenge wana nde ayebisaki yango na Yosèfe. Pe Yosèfe akokaki kotala miso na ye minene ya mwa moindo, pe akokaki komona ete asalaki mabé moko te pe alingaki kondima yango. Alingaki kondima yango na motema na ye mobimba, kasi ezalaki mpenza-mpenza libanda na momesano, pe akómaki na likanisi ya koboya ye na nkúku.

<sup>41</sup> Sikawa, soki moto azali sémbó na likambo, Nzambe akobongisa nzela moko mpo na kolakisa na moto yango ete ezali Solo. Atindami kosala yango, soki ozali sémbó. Soki omoni Yango, kasi opesi Yango mokongo, na ntango wana, okosambisama. Kasi, soki ozali sémbó pe omoni Solo!

Sikawa, Yosèfe azuaki bobele “likanisi”. Alobaki: “Ezali mpenza libanda na momesano!”

<sup>42</sup> Ezali pe bongo lelo, été bato, bato malamú, bato na mpiko, bato ya bizaleli malamú, batei malamú, mingi na bango, banganganzambe pe bongo na bongo, bazali bato malamú, kasi kotatolama ya kokamwa ya elaka ya lelo ezali mpenza libanda na momesano, kino ezali kopesa bango mpenza mobulu. Ezali kosala bongo mpo ezali kotalisama ya elembo ya Nzambe.

<sup>43</sup> Sikawa, Yosèfe, mobali na ye, azalaki moto malamú, aboyaki koyokisa ye nsoni na miso ya bato. Akokaki kondima yango te; a—amekaki. Kasi wana azalaki kokanisa makambo yango, Mwanje ya Nkolo asololaki na ye pe alobelaki ye.

<sup>44</sup> Sikawa, Alobaka ntango nyonso na ndoto te, Akoki komimonisa na yo na nzela na Liloba, mpo na kotalisa yo ete Ezali sóló, soki ozali mpenza sémbó mpo na koyekola Yango mpo na komona soki ezali elembo ya Nzambe oyo ezali komitalisa,

kasi esalamaka ntango nyonso na boyokani mpenza ná Liloba elakámá.

<sup>45</sup> Likambo mosusu, Liloba na Nzambe esémbolaka ntango nyonso libunga. Bondimi yango? Liloba ekataka likambo. Ntango Nzambe atatoli Liloba yango, ekati likambo.

<sup>46</sup> Sikawa, nazali na ndakisa moko na likanisi, oyo nalingi tómaniola. Tokoumela mingi mpenza te, mpo tolingi kobondela mpo na babeli. Tótala. Ntango Yesu, Azalaki Liloba. . . Biblia elobi ete Azalaki Liloba. Bisó nyonso tondimaka yango, ete Azalaki Liloba. Bótala malamú, ntango Azalaki na mibu zómi-na-mibale. Sikawa, ekomami esika moko te ete Akotaki kelasi. Kasi Mwana moke ya mibu zómi-na-mibale, ya molai *boye*, bango, baboti na Ye, Maria ná Yosèfe, bakendeki na tempelo mpo na . . . kino na . . . mpo na kokumbamela na eleko ya pásika. Pe wana bazalaki kuna, babandaki kozonga na ndako, sima na pásika, basengelaki kotambola mikolo misato, kasi bakokaki komona Yesu esika moko te. Pe suka-suka bamonaki Ye, sima na mikolo misato ya koluka Ye, kati na tempelo, kosolola likolo na Liloba na Nzambe ná bampaka.

<sup>47</sup> Pe bóyoka Maria sikawa. Sikawa, mpo na baoyo bazuaka ye lokola nzambe-ya-mwasi, bótala. Bomoni, mwa—mwasi moto apengwisamaki na ebandeli. Pe bótala ye malamú awa. Soki bomóná naino yango te, bótala yango malamú. Alobaki: “Ngai ná tata na Yo toluki Yo ná mpisoli na miso.” Bótala malamú, akweisaki litatoli (liboso na ba-nganganzambe wana) oyo asiláká kotatola. Alobáká ete “akúmbáká zemi na nzela ya Molimo Mosantu,” kasi awa abéngaki “Yosèfe” tata na Ye.

<sup>48</sup> Sikawa bótala Mwana yango ya mibu zómi-na-mibale, Azalaki Liloba mpo na eleko wana. Azalaki Liloba lilakamáki mpo na eleko wana, Masiya mopakolami. Bóyoka likambo Alobaki: “Boyebi te ete Nasengeli kosala mosala ya Tata na Ngai?” Liloba esémbolaka libunga. Bomoni, pe Oyo-ya-kokamwa, Mwana ya mibu zómi-na-mibale! Nandimi te ete Yesu asósólaki likambo nini Alobaki, kasi Azalaki Liloba, pe Liloba esémbolaka libunga. Bomoni, Asémbolaki mama na Ye, pe Apámelaki ye ndenge alobaki bongo. Sikawa, soki ezalaki—ezalaki mosala ya Tata na Ye, Alingaki kozala elongo na tata na Ye, soki Yosèfe azalaki tata na Ye.

<sup>49</sup> Kasi, bomoni, lokola amibulunganisaki pe azalaki motema likolo, lokola Eva, amemamaki, ee, alobaki: “Ngai ná tata na Yo tolukaki Yo ná mpisoli na miso.”

<sup>50</sup> Alobaki: “Boyebi te ete Nasengeli kosala mosala ya Tata na Ngai?” Bomoni ndenge Liloba esémbolaka, Esémbolaka libunga.

<sup>51</sup> Satana asáláki libunga ntango alukaki komeka Yesu. Kasi Ayanolaki ye ná Liloba na Ye Moko, pe Alongaki ye na Liloba.



<sup>52</sup> “Nzambe,” Biblia elobi awa, “na ntango ya kala pe na lolenge mingi, Amitalisaki na basakoli na Ye, Alobelaki ba-tata na nzela ya basakoli.” Sikawa, mpo na kotalisa elembo na Ye, ya komitalisa Ye moko na bato, bomoni, Alobelaki basakoli. Basakoli, bimononeli na bango, oyo etatolami, bazalaki—bazalaki elembo ya Nzambe oyo etalisami polele na nzela ya emononeli ya mosakoli.

<sup>53</sup> Sikawa, moto moko te akoki kolimbola emononeli, lolenge ya kosala yango ezali te. Ezali ya kokamwa. Ezali likambo oyo ozali komona makambo esilá kosalema, makambo ezali kosalema pe makambo ekosalema. Pe ezalaki nzela ya Nzambe, mpo na kotinda moto oyo azalaki koloba makambo yango pe kotalisa makambo oyo ekosalema (bobeke na mpokwa ya lelo te) mpokwa nyonso, mbala nyonso. Makambo nyonso alobaki esengelaki kolongobana mpenza ná Nkolo, esengelaki kozala Liloba ya Nkolo.

<sup>54</sup> Na boye, makabo pe kobéngama etali kobongola motema te. Okoki kokómisa miso na yo mwa moindo te ntango ezali bulé. Okoki komikómisa molai ya metre moko na centimetre ntuku mwambe te soki ozali bobele moolai ya metre moko na centimetre ntuku mibale. “Nani, na mitungisi na ye, akoki kobakisa bolai ya bomoi na ye ata moke?” Ná biso ná bino, tozali oyo tozali na ngolu na Nzambe.

<sup>55</sup> Sikawa, makabo pe kobéngama zángá kobongola motema. Basakoli oyo babotamaki basakoli. Móse abotamaki mwana kitoko. Yesu azalaki Mwana na Nzambe, liboso ya kozalisama ya mokili, mosalá ya Nzambe. Yilimiya... zómi-na-mibale, mibu nkama nsambo na zómi-na-mibale, nakanisi, liboso ábotama, azalaki mongongo na ye oyo...Te, bólimbisa ngai, Abongisamáká kozala mosakoli na mabota, pe a—pe abulisamáká na libumu ya mama na ye pe abongisamáká kozala mosakoli mpo na mabota. Yoane Mobatisi, yen de nazalaki kokanisa, ezalaki mibu nkama nsambo na zómi-na-mibale liboso ábotama. Azalaki mongongo na ye oyo azali kogánga kati na bilíki.

<sup>56</sup> Bomoni, ezali Nzambe nde atiáka moto na esika. Atindaka moto, oyo akomema Liloba ya eleko wana. Kasi sikawa, liboso bókoka kondima Liloba ya eleko yango, Amitalisaka, Ye moko, na elembo na Ye, bomoni, na nzela na boyebi, na nzela ya emononeli. Alobaki makambo makosalema, pe esalemaki. Pe Nzambe alobaki: “Ntango yango ekosalema, na boye bóndima ete azali na ndimbola ya Liloba, mpo Liloba ya Nkolo eyáka na moto oyo.” Pe mpo na koyeba ye, ayébanaka lokola momóni, na Kondimana ya Kala. Ezali mpenza polele ndenge ekoki kozala! Bilembo na ye eyébanaka, eyebani, etalisamaka polele, ezaleli na ye.

57 Sikawa, ezali bongo nde “Nzambe azalaki kosala kalakala,” ndenge Biblia elobi, “na lolenge mingi, Asololaki na ba-tata na minoko ya basakoli, kasi na mikolo oyo ya suka, Asololi na nzela na Yesu Klisto, Mwana na Ye.”

58 Sikawa, Yesu alobaki, na Yoane 10:37: “Soki Nasali misala ya Tata na Ngai te, na boye, b́́ndimela Ngai te.”

Bomoni, balobaki: “Ozali Moto, kasi Ozali komikómisa Nzambe.”

59 Alobaki: “Soki Nasali misala ya Tata na Ngai te, na boye, b́́ndimela Ngai te.” Sikawa, Alobaki: “Yoane azalaki pole oyo ezali kopela pe kongenga. Bino, malamú, b́́sepelaki kotambola na pole na ye mpo na ntango moke. Sikawa, Yoane alobaki: ‘Ngai nasengeli kokita; Ye asengeli komata.’” Azalaki Pole ya mokili, mpo Azalaki Liloba ekómi nzoto, etatolami pe eyébani. Bomoni, Azalaki Nzambe elongo na biso.

60 Basakoli bazalaki Nzambe elongo na bango. Yesu alobaki bongo. Alobaki: “Soki bobengaka baoyo Liloba na Nzambe eyaka epai na bango ‘ba-nzambe’, ndenge nini bokoki kokweisa Ngai ntango Nalobi ete Nazali Mwana na Nzambe?” Bomoni? Na boye, esika Liloba oyo Nzambe alobaki etatolami, na bongo, ezali Nzambe nde Azali komitalisasala na nzela ya elembo na Ye, kokokisa Liloba na Ye. Esengeli na ndimbola moko te. Esili kolimbolama, Yango moko, kotalisa eloko nini Yango ezali.

61 Ezali mpenza lokola ntango Alobaki: “Tika ete pole ézala,” pe pole ezalaki, ozali na ntina te ya koloba: “Ee, elingaki koloba nini?” Elingi bobele koloba, yango wana, etalisi yango polele. Esili na yango kosalema.

62 Sikawa, Yesu alobaki: “Soki Nasali misala ya Tata na Ngai te,” to na elobeli mosusu, “soki Nazali na elembo ya Tata na Ngai te, b́́ndima yango te. Yango ezali kotalisa ezaleli na Ngai, Nani Ngai nazali. Soki bokoki kondima Ngai te, na boye, b́́ndima kotalisama oyo Nzambe asili kopesa. Soki bino—soki bino te. . . Soki Ngai te, soki ezaleli na Ngai etalisi polele te esika na Ngai, na boye, b́́ndima makambo Nazali koloba te.” Bomoni? Bososoli yango na mpokwa oyo? Bato boni basosoli yango, b́́tombola maboko. Bomoni? “Soki ezaleli na Ngai ezali kotalisa te Ye oyo Natátolaka kozala,” Yesu alobaki, “na bongo, b́́ndima ko. . . Soki bokoki kondima Ngai te, ee, b́́ndima bobele ko—ko—kotalisama ya ezaleli oyo Ngai nazali.”

63 Yoane 14:12: “Ye oyo akondimela,” Yesu alobaki, “Ngai, misala mizali Ngai kosala, ye pe akosala yango.” Sikawa b́́tala: “Ye oyo akondimela Ngai,” mondimi ya solo, “misala mizali Ngai kosala, ye pe akosala yango.” B́́tala malamú. Na elobeli mosusu, ezali boye: “Ye oyo akondimela Ngai, akotalisama na elembo na Ngai, misala.” Sikawa, yango nde makambo Asalaki. Alobaki: “Soki Nasali misala ya Tata te, na bongo, b́́ndima Ngai te.” Pe Tata asololaki na basakoli, pe yango nde ezalaki elembo na

bango, kotalisama. Ezalaki pe bongo mpo na Yesu. Pe yango elakamaki na ye oyo akondima: “Bilembo na Ngai ekosala kati na ye lolenge moko esalaki kati na Ngai. Pe soki Nasali misala ya Tata na Ngai te, na bongo, bóndima Ngai te. Kasi soki Nasali misala yango, pe bokoki kondima Ngai te, na boye, bóndima misala, mpo yango nde elobamaki, esengeli kokokisama.”

<sup>64</sup> Alobaki: “Bóluka-luka na Makomi, mpo kati na Yango nde bokanisi ete bokozua Bomoi na Seko, pe Yango nde Ekoyebisa bino Nani Ngai nazali.” Oyo wana ezalaki Yesu, bomoni, Nzambe atalisami polele, Azali komilakisa. “Yango nde etatolaka Nani Ngai nazali.” Yango ezali kokokisa Baebele 1:1 sikawa, “Nzambe, kalakala, asololaki na nzela ya basakoli,” kotalisa polele sikawa elembo ya lisekwa ya Mwana na Ye. Na ntango wana, Nzambe asololaki na minoko ya basakoli, sikawa na nzela ya Mwana na Ye. Nzambe oyo abongwanaka te, elembo yango moko: “Misala mizali Ngai kosala, bino pe bokosala yango.” Nzambe, ayebani na elembo etalisami na Ye. Ezali lolenge wana nde bayebaka yango.

<sup>65</sup> Okoloba: “Ee, nakoyebisa yo *boye*, toyembaka *boye*, tosalaka *boye*, pe tosalaka.” Nazali kolobela likambo wana te.

<sup>66</sup> Nazali kolobela nde Liloba oyo ezali kotalisama pe komonisa . . . na nzela na yango, bilembo ya Liloba lilakámi mpo na eleko oyo.

<sup>67</sup> Bafalisai bayebaki Biblia yango malamú lokola bato nyonso, malamú koleka biso bakambi ya mangomba toyebi yango lelo. Basengelaki kobika kokokana na Yango. Ba-nkoko ya ba-nkoko ya ba-nkoko na bango bazaláki ba-nganganzambe. Bazalaki koyekola Yango, butu pe moi, kasi bazangaki komona Liloba oyo etalisamaki polele.

<sup>68</sup> Lelo, Luther alobaki: “Ntango ondimi, ozui Yango.” Metodiste alobi: “Ntango ogangi, ozui Yango.” Pantekotiste alobi: “Ntango olobaki monoko ya sika, ozuaki Yango.” Tomoni ete nyonso wana ezali lokuta! Bamosusu na bango balobaki: “Kozala na mbuma ya Molimo nde kozala na Yango.” Kasi ezali lokuta! Ndanga bobele moko, ezali ntango kotatolama, ntango Nzambe Ye moko amitalisi polele na Liloba lilakámáki mpo na eleko. Ezali mpenza yango.

<sup>69</sup> Nani azalaki na mbuma ya Molimo koleka banganganzambe mibange ya bobótó wana, baoyo bazalaki kokáta bana mike ngenga pe kopámbola bango, pe makambo nyonso mosusu wana? Kasi tálá moto oyo, Yesu, ayaki, akweisaki ba-mésá ya mbeka, atalaki bango na nkándá, abetaki bango, abenganaki bango, ayébanaki ata moke te. Makomi nde ezali kotalisa Ye polele! Azalaki na kalati ya lingomba moko te, Azalaki moto ya ebongiseli moko te. Kasi Nzambe alobáki mpo na Ye, yango ezalaki kotalisama na Ye!

<sup>70</sup> Yango nde kotalisama ya solosolo ya Nzambe na bileko nyonso, yango nde kotalisama na Ye. Ezali mpenza yango, Makomi oyo elakámáki, ezali koyébana na elembo ya elaka, oyo ezali Nzambe, pe Nzambe azali Liloba. Pe elembo ya elaka yango, ntango eyébani, yango nde ezali kosala mondimi. Yesu alobaki bongo, pe yango ekati likambo. Amen.

<sup>71</sup> Bótala malamau, sikawa tomoni ete bilembo etalisakaka Ye. “Soki . . .” Alobaki: “Soki esali yango te, na boye, bóndima Ngai te.” Sikawa, Yesu alobaki ete ekotalisa Ye.

<sup>72</sup> Pe sikawa bómikanisela, ete na mikolo oyo, mikolo oyo ya suka, ndenge Baebele 1:1 elobi: “Nzambe, mbala mingi pe na lolenge mingi, asolólaki na ba-tata na minoko ya basakoli. Na mikolo oyo ya suka, Asolóli na biso na nzela ya Mwana na Ye, Yesu Klisto.” Bomoni? Koyébana ya Nzambe Ye moko, etalisamaki ma motindo moko, ndenge Asalaki kalakala, kosalela elembo na Ye ndenge moko. Amen. Bótala Baebele 13:8, elobi: “Azali motindo moko lobi (mbala mingi), lelo pe libela motindo moko!” Lolenge na Ye moko ya kosala, nzela na Ye moko, elembo na Ye moko, makambo nyonso ezali motindo moko! Nzambe, Nzambe oyo abongwanaka te akoki ata moke te kotángwa na elembo na Ye, ndenge moko pe Akoki kotángwa na mobeko na Ye te. Yango nde Ye azali, Azali Liloba. Azali Liloba mpo na ntango. Azali Liloba, ntango Akeláki mokili, ezaláki Liloba. Ntango Akeláki moto, ezaláki Liloba, misala na Ye. Ntango Akeláki Klisto, ezaláki Nzambe, Emanuele. Pe ntango Akómisaki Ye Mobikisi, ezaláki misala na Ye. Ntango Akómisaki Ye Mobikisi-bokono, ezaláki misala na Ye. Bomoni? Ezali ntango nyonso Liloba oyo ezali kotalisama, Liloba etalisami na nzela ya elembo ya Nzambe. Bótala lolenge ya kosala, Ye, ntango nyonso, Abongwanaka ata moke te.

<sup>73</sup> Bótala bato misato oyo bayaki epai ya Abalahama, oyo afandaki na ekuke ya hema na ye mokolo wana. Tokotala ye, kuna, na miníti moke. Asilaki koya, asilaki kobéngama kobima na mokili ya Kaladi, ya Ba-kaladi, na engumba ya Ulu. Asilaki kotika engumba na ye, na kotósa mitindo ya Nzambe, ete ákabwana mobimba na kozanga kondima nyonso. Yango nde elembo ya liboso ya Nzambe, kokabwana mobimba na kozanga kondima, ntango Abéngi moto!

<sup>74</sup> Pe Apesaki ye likambo moko oyo, na bosóló mpenza, na mobimba mpenza, ekokaki kosalema te, na bomoto mpenza, mpo na kondima yango. Alobaki: “Abalahama, yo . . .” Azalaki na mibu ntuku nsambo na mitano, pe Sálá, mibu ntuku motoba na mitano. Bango, azalaki, ngámbo moko, ndeko na ye ya mwasi, babikaki elongo mibu nyonso wana kozánga bana. Alobaki: “Nakopesa yo mwana-mobali na nzela na Sálá, pe ye, na nzela na ye Nakómisa yo tata ya bikólo mingi.” Bongo, ye andimaki yango.

<sup>75</sup> Ntango elekaki, mbongwana ata moke te kati na Sálá. Bomoni? Asilaki koleka eleko yango, a—asilaki koleka ntango-ya-kobota ya mwasi. Mibu ntuku motoba na mitano, asilaki mpenza koleka ntango yango. Abalahama, mibu ntuku nsambo na mitano, nzoto na ye esilaki kokufa. Libumu ya mwasi na ye esilaki kokufa. Kasi Abalahama atiaki ntembe ata moke te na eláká ya Nzambe, mpo na kozanga kondima. Akobaki kondima, mpo Nzambe alobaki yango, pe andimisamaki: “Soki Nzambe alobaki yango, bilembo na Ye ekosala likambo Alobaki!” Sikawa, biso tobéngami kozala bana ya Abalahama, Momboto ya Abalahama! Bongo na bongo, mibu ntuku mibale na mitano elekaki. Bokeseni ata moke te kati na Sálá, eloko moko te, akómaki bobele mobange koleka, mokongo egumbami, ná mobali ndenge moko. Kasi Abalahama akóbaki kondima yango.

<sup>76</sup> Pe mokolo moko, ntango Nzambe amónaki ete mosali na Ye akánaki kozala ndakisa mpo na bato ya lelo, pe na nzela na ye nde Akopámbole bikólo, na ntóngó moko ya mói makasi, na ba-ngonga ya zómi na moko, bato misato bayáki epai na ye. Basololaki na ye. Pe abengisaki bango kokota kofanda na kati. Ezalaki na likambo moko na bango oyo ezalaki na bokesene na bato. Makambo ya molimo esósólamaka na makambo ya molimo. Bótala malamumu, bakótaki pe bafándaki. Abalahama atálaki bango malamumu, alobaki: “Nkolo na ngai.” Asengelaki kosala nini?

<sup>77</sup> Mibale na bango bakendeki koteya na Sodoma, oyo ezali litatoli ya mikolo oyo, lelo. Yango nde lolenge na bino misato ya bato: Sodoma, ná lingomba oyo ezali na Sodoma, Abalahama Moponami azali na Sodoma te. Batindami mibale, Billy Graham ya mikolo oyo ná. . . Bómikanisela, kati na batindami nyonso na lingomba, ata moto moko te asílá kokende na lingomba ya bibongiseli, kuna, oyo nkombo na ye esuka na h-a-m. Ezalaki Finney, Sankey, Knox, Calvin, bongo na bongo, Billy Sunday, ná bamosusu, kasi ata moke te G-r-a-h-a-m, to moko esuka na h-a-m, oyo elingi koloba “tata ya bikólo”. Akendeki kuna, koteya. Bótala ngonga nini tokómi! Tozali na bandimi ya maloba, bazangi kondima pe bandimi. Bato misato oyo bayaki. Mibale na bango bakendeki na engumba, Billy Graham ná Oral Roberts ya mikolo oyo, kuna, kati na bato, bazali koteya. Likambo yango, Yesu alobelaki yango.

<sup>78</sup> Bótala, Moponami azalaki koya. . . afandaki awa libanda, Abalahama ná etóna na ye. Pe ntango, Moto oyo atikalaki ná Abalahama, bótala Ye malamumu, Atalisaki elembo ya Nzambe, mpo Alobaki: “Sálá azali wapi?” Nkombo na ye ezalaki Salái, mokolo moko liboso; sikawa ekómi Sálá, S-á-l-á. Alobaki: “Abalahama,” Abalayama te, “Abalahama, mwasi na yo, Sálá, azali wapi?”

Alobaki: “Azali kati na hema, sima na Yo.”

<sup>79</sup> Alobaki: “Nakoya kotala yo.” Na bongo, Abalahama ayokaki maloba yango. “Nakoya kotala yo kokokana na ntango ya bomoi.”

<sup>80</sup> Pe Sálá asekáki, ndenge esalemaki, komunga-munga, kati na ye moko, pe alobaki: “Ngai mobangé, nkolo na ngai pe mobange, tósepela lisusu lokola bilenge mibali pe basi? Na oyo—na oyo etali bokutani na nzoto, ntango mosusu, esílá koleka mibu ebelé. Ngai?” Asekaki.

<sup>81</sup> Pe Moto yango, atalaki Abalahama, Sálá azalaki kati na hema, sima na Ye, alobaki: “Mpo na nini Sálá aseki pe alobi boye: ‘Ndenge nini makambo oyo ekosálema?’” Amitalisaki Ye moko.

<sup>82</sup> Pe Abalahama abengaki Ye “Elohim”. Sikawa, motángi nyonso ya Biblia, kati na bino, ayebi yango. Elohim, Nzambe, Oyo-akoká-na-nyonso, bomoni, atalisamaki kati na nzoto ya moto oyo azalaki kolia mosuni ya mwana-ngómbe, komela míliki ya ngómbe, pe kolia lipa ná mantéka. Elohim atalisaki bilembo ya Nzambe, pe Abalahama abengaki Ye “Nzambe”. Ezali nini? Atalisamaki, Elohim!

<sup>83</sup> Yesu alobaki, na Luka, mokapo ya 17, ete na mikolo ya suka (Nzambe, mbala mingi, azalaki koloba na minoko ya basakoli, na mikolo ya suka na nzela ya Mwana na Ye), sikawa bójala, Alobaki: “Na ntango oyo Mwana na moto akomonisama.” Bótala malamú, “komonisama,” koyébana na mikolo oyo ya suka, liboso na ntango ya suka, ntango Mwana na moto akomonisama, likambo oyo ya Sodoma ekozonga lisusu. “Ndenge esalemaki na mikolo ya Sodoma, ekosálema pe bongo na boyei ya Mwana na moto, ntango Akomonisama, akoyébana na Lingomba, na Baponami (na Sodoma to na bato ya Sodoma te, to baoyo bazalaki na Sodoma), na Baponami.” Abalahama azalaki Moponami. Pe Momboto mokonzi ya Abalahama ezali bandimi, na nzela ya Klisto Yesu Liloba, pe ezali Baponami. Pe ntango Mwana na moto akomonisama, likambo yango ekosálema lisusu.

<sup>84</sup> Bótala mokili lelo. Soki ezali mpenza Sodoma ná Gomora te, namóná naino yango te. Sodoma ná Gomora! Bótala lingomba, lokola Lóta, oyo afandaki kuna pe molimo na ye ya moyengebene ezalaki koyoka mawa, ntango azalaki komona masumu ya Sodoma. Batei mingi bafandi na . . . Moto malamú afandi na biró na ye, azali kobongisa liteya na ye pe bongo na bongo, soki abwaki miso libanda pe amoni basi balati ba-kupé, pe bilamba ya nsoni nyonso wana, pe makambo esalemaka ndenge wana, akoki kolobela yango ata moke te, ebongiseli na ye ekolongola ye. Lóta azangaki mpiko ya kozua ngámbo ya Likambo oyo ezalaki malamú, ezali pe bongo na Sodoma ná Gomora ya mikolo ya lelo.

<sup>85</sup> Kasi ezali na bamosusu oyo bazali libanda na Sodoma, baoyo babótami libanda na yango, na mokano ya moto te, kasi na mokano ya Nzambe pe Momboto ya Nzambe. Bótala kotalisama

oyo kuna, ezalaki bobele matéya te, kasi elembo etalisaki Liloba na Nzambe oyo ekómaki nzoto kati na moto. Likambo yango ezali kozónga lisusu ndenge esalemaki, pe ezali mpenza mokolo yango. Makambo nyonso ebongi be, makambo nyonso etiami mpenza na molongo. Soki tokokaki kozala na ntango ya kokóba na likambo yango ba-miniki moke, kasi tozali na yango te, bongo, tokosala nokinoki. Likambo yango esengeli kosalema lisusu na mikolo ya suka.

<sup>86</sup> Sikawa, Baebele 10:1: “Nzambe, mbala mingi, na minoko ya basakoli, Amitalisaki. Pe na mikolo ya suka Amitalisi Ye moko na nzela ya Mwana,” ekómisi Ye Baebele 13:8, “motindo moko lobi, lelo pe libela.”

<sup>87</sup> Bótala malamau, Nzambe, mbala mingi, asolólaki na Móse. Pe sikawa, bómikanisela, Amitalisaki Ye moko na nzela ya Póle, Likonzi na Móto na nzete epelaka-móto. Ezali lolenge wana nde Asalaki yango, mbala mingi. Pe Asololaki na Móse. Pe Póle yango, Esalaki eloko nini? Etalisaki elembo ya Nzambe, Elobaki Liloba: “Nayoki kolela-lela ya libota na Ngai kuna na Ezipito. Nasili komona konguluma na bango pe koyoka kolela na bango, pe Namikaniseli Liloba na Ngai. Nakokita, Likonzi na Móto, Póle, mpo na kokende kosikola libota yango. Natindi yo, Móse.”

<sup>88</sup> Bótala bilembo ya Nzambe. Azuaki libóke ya mputulu na loboko pe abwakaki yango na likolo, pe ekómaki nsili. Elembo ya Mokeli ya Nzambe ezalaki kati na Móse.

<sup>89</sup> Pe Móse alobaki, na Dutelonome 18:15, pe alobaki: “Yawe Nzambe na bino akotélémissa Mosakoli moko lokola ngai.” Sikawa bótala, ezali lisusu Liloba, elembo. Nzambe alobaki na nzela ya Móse, ye ayebisaki bango ete Nkolo akotélémissa Moto moko lokola ye. Sikawa bótala malamau ndenge bilembo ya Yesu etalisaki ete Azalaki Liloba oyo elakamaki. Ntango Móse alobaki ete ekosalema, ezaleli ya Yesu emonisaki yango. Bótala malamau sikawa: “Yawe Nzambe na bino,” ezali Nzambe, ezali Liloba, “akotélémissa Mosakoli moko lokola ngai. Moto nyonso oyo akondima Mosakoli yango te, akolongolama kati na libota.” Sikawa bótala, ntango Yesu ayaki, na boye, lolenge ya elembo nini Asengelaki kozala na yango? Bomoni, bótala malamau, sikawa, Liloba elakamaki, elakamaki ete Akozala Mosakoli lokola Móse.

<sup>90</sup> Sikawa, bazalaki na lolenge nyonso ya balakisi, lolenge nyonso ya ba-lábi. Bazángaki kozala na mosakoli na mibu nkama minei, longwa ntango—longwa ntango ya Malaki, pe sikawa, na mbala moko, Moto moko ayei komimonisa.

<sup>91</sup> Sikawa, ezalaki na molóbi mbisi moko, mibale na bango, bana ya moto moko, moko na bango, nkombo na ye Andélé, pe mosusu nkombo na ye Simona. Tata na bango ayebisáká bango lolenge nini kosénzela makambo na eleko na bango; makambo mingi ya lokuta esiláká komonana. Mobange yango... Nasila

kotanga buku moko, mbala moko, esika, ekokaki kozala ntango mosusu mabánzo, nayebi te, ete alobaki: “Bana na ngai, sikawa, liboso ya boyei ya Masiya mpenza, lolenge biso nyonso tozali kozela, ekozala na ntango moko oyo makambo ndenge na ndenge ekosalema. Kasi lolenge bokoyéba Masiya yango, Akolóngobana na Makomi. Akozala Mosakoli, mpo Liloba na Nzambe elobaki ete Azali Mosakoli.”

<sup>92</sup> Andélé ayokaki Yoane. Ee, likambo sé moko oyo Yoane azalaki kosala, ezalaki kosakola. Boyebi, Yesu alobaki: “Botambolaki mpenza na póle ya Yoane, kasi Ngai nazali na Póle monene koleka Yoane. Nazali na kotalisama monene koleka Yoane, mpamba te, misala oyo Tata asili kopésá Ngai kosala, yango ezali kotatola mpo na Ngai.” Yoane atéyaki bobele koteya, ayaki bobele liboso, asalaki ekamwiseli moko te to elembo ya Nzambe moko te kokokana na elaka. Kasi Yesu ayaki ná elembo yango!

<sup>93</sup> Simona akendeki koyoka Ye, mokolo moko, pe bobele ntango. . . Ntango mosusu Simona akendeki ná Andélé. Andélé azaláká kokende koyoka longwa ebandeli. Kasi, Simona, ntango akómaki liboso na Bozali! Sikawa bóyoka, mpo na kosukisa. Ntango akómaki liboso na Bozali na Yesu, Yesu atalaki ye, Alobaki: “Nkombo na yo Simona, pe ozali mwana ya Yona.” Bomoni, elembo ya likambo oyo elakamaki etalisamaki kati na Ye.

<sup>94</sup> Moto yango ayebaki kokoma nkombo na ye te, Biblia elobi ete azalaki moínga pe atángá te. Kasi ezalaki kotalisama polele mpenza, kino, nokinoki, atikaki kozanga kondima na ye nyonso, pe alobaki: “Oyo nde Masiya oyo tozalaki kozela!” Malamu, andimaki Yango.

<sup>95</sup> Ezalaki na mosusu oyo azalaki kuna, nkombo na ye Filipino, akendeki mbangu na ngámbo mosusu ya engumba, na ngómba, na ekólo, pene na kilometre ntuku mibale na minei, pe azalaki na moninga moko, ayaki ná ye mokolo elandaki, nkombo na ye Natanaele. Akutaki ye na nse ya nzete, azalaki kobondela. Alobaki: “Yáká kotala Moto oyo tosili komona, Yesu ya Nazaléte, mwana ya Yoséfe.”

<sup>96</sup> Alobaki: “Tika, tika, tika! Eloko ya malamu ekoki mpenza kobima na Nazaléte, kati na bato mpamba-mpamba wana?”

Alobaki: “Yáká kotála!”

<sup>97</sup> Yango nde likambo malamu koleka—likambo malamu koleka, oyo moto akoki kosala. Kotikala na ndako te mpo na koloba mabé. Yáká kotála, luká-luká na Makomi! Yáká kotála!

<sup>98</sup> Nzela-nzela, bazalaki koya, kosolola na ntina na makambo oyo ezalaki kosalema, ayebisaki ye likambo ya Simona ndenge nini Ayébaki ye, ná tatá na ye pe bongo na bongo.



99 Bongo ntango akotaki na molongo, ekokaki kozala molongo ya mabondeli, ekokaki kozala libanda na liyangani, nayebi te. Kasi esika nyonso oyo akomaki, Yesu abwakaki miso likolo na ye mbala ya liboso, Alobaki: “Bótala Moyisalaele, oyo azali na bokosi te kati na ye!”

Alobaki: “Lábi, ntango nini Oyebaki ngai?”

100 Alobaki: “Liboso Filipino ábénga yo, ntango ozalaki na nse ya nzete, Namonaki yo.” Ezalaki kotalisama ya bilembo ya Nzambe apakolámi.

101 Alobaki: “Lábi, Ozali Mwana na Nzambe!” Ezalaki nini? Bilembo na Ye etalisaki Ye polele. Ayebaki, na nzela ya Makomi, ete ezalaki Mopakolámi yango, Nzambe apakolámi kati na nzoto. Nzambe azalaki kati na Klisto, kozongisa mokili na boyokani ná Ye moko. Alobaki: “Lábi, Ozali Mwana na Nzambe. Ozali Mokonzi ya Yisalaele.”

102 Yesu alobaki: “Mpo Nalobi bongo, ondimi Ngai? Okomóna makambo minene koleka oyo.”

103 Sikawa, ezalaki na baoyo bazalaki wana pe bandimaki Yango te. Balobaki: “Moto oyo azali Bezezebula, Azali moto na solóka.”

104 Yesu alobaki: “Nalimbisi bino mpo na yango. Kasi ntango Molimo Mosantu akoya kosala makambo yango moko, liloba moko kotélémela Yango ekolimbisama ata moke te, na ekeke oyo, to na ekeke ekoya.”

105 Bomoni, mbondi mpo na masumu esalemaki naino te. Bomoni, ekokaki kosalema te, bokoki te kozala na . . . Bokoki kobwakama na lifelo te liboso na bino koleka na kosambisama. Ekólo oyo ekoki kosala yango te, Nzambe pe te. Bomoni, bokozala esika moko, kozela ná minyololo ya boloko, kino bokosambisama. Pe, bomoni, Akokaki kobwaka bango mosika te, mpo mbondi mpo na masumu esalemaki naino te.

106 Kasi sima na kufa na Ye, kokundama, pe Elembo kotiamana longwa na Makila, Molimo Mosantu, na ntango wana, kolobela Yango mabé, ezali lisumu ekoki kolimbisama te. Kolobela Yango mabé bobele na liloba moko, ekoki na yango, na ntango wana, kolimbisama ata moke te ekozala esika moko. Kolobela Yango mabé na liloba moko, bomoni, ezali mpenza likambo moko monene.

107 Sikawa, na bongo, tomoni lisusu, ete likambo yango etalisaki Ye polele lokola Masiya mopakolami. Nzambe kati na Klisto, Mbondi mpo na masumu na ntango ya suka, Klisto azali kosala mbondi mpo na masumu na ntango ya suka. Sikawa, mpo na Natanaele, a—a—andimaki Yango pe ayébaki Ye.

108 Ezalaki na mwasi moko oyo ayaki na libulu ya mai, mokolo moko, na Sikare, engumba moko ya—ya Samaria. Yesu azalaki na mposa ya kolekela kuna, ntango Azalaki kokita na nzela wana,

kokita ngómba, longwa na Yelusaleme, mpo na kokende na Yeliko, kasi Alekaki na nzela ya Samaria. Alobaki ete Azalaki na “mposa ya kokende”, Tata akambaki Ye na nzela wana. Ntango Akómaki kuna, Atindaki bayekoli na Ye mosika. Afandaki, komituna mituna, nakanisi, ntina ya likambo yango.

<sup>109</sup> Sikawa bómikanisela, Santu Yoane 5:19, Yesu alobaki: “Sóló, Nazali koloba na bino, Mwana akoki kosala likambo moko te, na Ye moko, bobele likambo Amonaka Tata kosala.” Sikawa bómikanisela, Asalaki ekamwiseli ata moko te, ezali te ntango *Ayokaki* yango, kasi ntango “Amonaki” yango. “Mwana asálaka eloko moko te kino Akomona Tata kosala yango liboso.”

<sup>110</sup> Bomoni, likambo yango etalisaki nani Ye azalaki, Mosakoli yango, Nzambe-Mosakoli. Koleka Mosakoli, Azalaki Nzambe! Nyonso oyo basakoli bazaláki, ezalaki kati na Ye, pe bakísá. Basakoli bazaláki bobele na eteni ya Liloba. Ye azalaki na Liloba nyonso, Azalaki Liloba na litondi na Yango. Kasi bótala malamú: “Nzambe, mbala mingi, asololali na lolenge mingi, na nzela ya biteni mike-mike. Na ntango oyo ya suka, litondi ya Liloba esili koya kati na Mwana na Ye Klisto Yesu, Nzambe aláti nzoto elongo na biso.”

<sup>111</sup> Elenge mwasi oyo ya bomoi mabe, tobengaka ye, ntango mosusu, mwasi-ya-ndumba. Ntango mosusu mwana yango abwakamaki na balabala. Ntango mosusu, lokola lelo, ezalaka mpenza kobéba ya bilenge te, ezalaka nde kobéba ya babóti, kotika bilenge basi kobima pe kosala makambo ndenge wana. Ntango mosusu elenge mwasi kitoko, akendeki kuna mpo na kotóka katíni ya mai, na ba-ngonga ya zómi na moko.

<sup>112</sup> Sikawa, bómikanisela, soki bosílá kokende na ebimelo na ntango, babóngoli yango ata moke te, ezali bobele mimesano yango moko. Basi bakendeke kuna, bangondo bakendeke na libulu-ya-mai na ntongo-ntongo mpo na kotóka mai. Mwasi-ya-ndumba to ya bomoi mabe akoki kokende elongo na bango te. Basanganaka te.

<sup>113</sup> Ye asengelaki kokende kuna sima na bamosusu kosilisa. Ayaki, ntango mosusu asili kolemba, ntango mosusu azuaki elenge mobali ya sika, lokola mobali na ye na butu wana. Ayaki, azalaki na mbeki-ya-mai, akitisaki yango. Abongisaki yango, etókelí, mpo na kokitisa yango, ayokaki Moto moko koloba: “Yéla Ngai mai ya komela.”

<sup>114</sup> Abwakaki miso pe amonaki elenge Mobali moko atelemei wana, ná mandefu na Ye mwa pembe. Akokaki kozala na mibu ntuku misato, kasi Biblia elobi ete Azalaki lokola na mibu ntuku mitano. “Okokisi naino mibu ntuku mitano te, bongo olobi ete Omóná Abalahama?”

<sup>115</sup> Alobaki: “Liboso Abalahama ázala, NGAÍ NAZALI.” Bomoni? Bomoni, basosolaki Yango te. Azalaki kolongola mosika na Ye ba-goi-goi.

116 Lelo tosengeli kobóndela, kobémbelisa, koléte, kobóndela, kondimisa pe kopesa bilaka na Baklisto, mpo na koya na losambo: “Soki bayei na losambo, tokosala boye na boye.”

117 Yesu, ntango Azalaki na mokili, Azalaki na bato mingi koleka elongo na Ye. Atalaki pembeni pe Amonaki liyangani, Alingaki kokabwana na bango, Alobaki: “Soki bolei mosuni ya Mwana na moto te pe bomeli Makila na Ye te, bozali na Bomoi kati na bino te.”

118 Bokoki kokanisa mónganga oyo azalaki wana? “Ee,” alobaki, “Moto oyo alingi kokómisa biso bameli-makila-ya-bato. Komela Makila na Ye? Boléma! Bino nyonso bókende na bino pe bótika Moto ya libóma wana.” Bakendeki na bango.

119 Alimbolaki Yango ata moke te. Azalaki na ntina ya kolimbola Yango te. Mbala mosusu Aningisaka kondima na bino mpo na komona likambo nini bokosala. Pe Azali kosala likambo yango moko lelo oyo, iyo, kotika yango komónana lokola elima mwa moke mpo na yo, mpo na komona esika nini yo otelemi, soki ondimi mpenza.

120 Bómikanisela, bango . . .-yekoli, babongisamáká liboso na Nzambe, baninganaki ata moke te. Bakokaki kolimbola Yango te, kasi baboyaki kokende. Na sima, Ayaki lisusu, Alobaki . . .

Liyangani mobimba yango, nkóto na nkóto, bakendeki.

121 Alobaki na ba-ntuku nsambo oyo bafandaki wana, batei na Ye oyo Abulisaki bango mpo na kokende koteya liboso na Ye, Alobaki: “Nakoningisa bango mpo na komona esika nini bazali.” Bongo, Alobaki: “Ee, bokoloba nini ntango bokomona Mwana na moto kobuta na Likolo esika Aútáki?”

122 “Mwana na moto komata na Likolo? Tolóbaka mbisi elongo na Ye, toláláka na libongo ya ebale elongo na Ye. Toliáka elongo na Ye. Tomonaki eliélo ya bibwele, esika Abótámáki. Toyebi mama na Ye, bandeko na Ye. Bongo Mwana na moto oyo nde akomata likolo esika Aútáki? Aútá na Nazaléte! Maloba yango ezali makasi.” Bango pe bakendeki na bango. Balobaki: “Tokoki kososola Yango te.” Bomoni? Likambo nini esalemaki? (Eningisaki bayekoli yango ata moke te. Bakokaki kolimbola Yango te.) Bango nyonso bakendeki na bango. Alimbolaki Yango ata moke te. Asengelaki ata na yango te.

123 Lelo tozali na milóná ya ba-pepinières, oyo ebengami Baklisto, moto oyo bosengeli kobwakela mai, kobondela ye, kosepelisa ye, “Pe bokolinga kozala na bondeko ná ngai, bokolinga koyokana ná ngai, bokolinga kosala *boye*”. Oh, bozali mpenza etongá ya milóná ya pepinière! Tozali na mposa ya Boklisto ya solosolo, baoyo babotami na Molimo ya Nzambe. Pe yango ezali na ntina ya boyokani moko te, eloko mosusu te, bazali na mposa ya eloko moko te.

124 Yesu abóngwanaki, atalaki bayekoli yango pe alobaki: “Bino pe bolingi kokende? Bino pe bolingi na bino kokende?” Alobaki: “Naponaki bino, zómi na mibale, kasi moko na bino azali zábolo. Mpo na nini bino pe bokei te?”

125 Bongo Petelo alobaki maloba ya lokumu oyo: “Nkolo, tokokende wapi? Tosili kondima mpenza, toyebi ete Yo ozali Liziba eyébani ya Bomoi. Ozali na Liloba, pe bobele Yango. Tosili kondima mpenza.”

Elenge mwasi oyo azalaki kuna. Ye alobaki: “Yéla Ngai mai ya komela.”

126 Alobaki: “Ezali momesano te, toyokanaka te, tozalaka na makambo ya ndenge wana awa te.”

127 Ayebisaki ye mbala moko ete bokeseni ezali te kati na Moyuda to moto mosusu nini. Azalaki Nzambe. Alobaki: “Kende kobénga mobali na yo, pe yáká awa.”

Alobaki: “Nazali na mobali te.”

128 Alobaki: “Olobi solo. Ozalaki na bango mitano, pe ye oyo ozali kobika ná ye sikawa, azali ya yo te.”

129 Sikawa bótala mwasi yango. Likambo moko esalemaki, mwa Momboto ebongisámá liboso ezalaki na motema na ye!

130 Ntango Alobaki Yango na Bafalisai, bótala bango, babébisaki mpenza lokumu ya makambo bazaláki kotátola. Batátolaki ete bazali Baklisto, batátolaki ete bazali balandi, batátolaki ete balingaka Ye. Kasi ntango Sóló eyáki, Ekotisaki bango mpenza na molili.

131 Kasi ntango oyo eyaki, Epesaki Bomoi, Elongolaki molili pe ekómisaki yango nyonso pembe. Alobaki: “Wapi. . .”

132 Alobaki: “Misie, namoni ete Ozali Mosakoli. Sikawa, tozuá naino moko te na mibu nkama minei, bomoni. Namoni ete Ozali Mosakoli. Sikawa, toyebi ete ntango Masiya akoya, kotalisama na Ye ekozala elembo ya lolenge wana, Akoyebisa biso makambo oyo.”

Alobaki: “Nazali Ye oyo azali koloba na yo.”

133 Pe, mpo na yango, abwákaki mbeki-ya-mai na ye, akendéki na engumba pe alobaki: “Bóya kotála Moto oyo ayebisi ngai makambo nasilá kosala. Yango nde mpenza elembo ya Masiya mopakolami oyo azali Liloba, oyo eyebi makanisi ezalaka kati na motema, boye te? Ye nde Masiya te?” Oh! la la!

134 Bótala, mwasi ya litangá ya makila, Ye ayébanaki na ye, na elembo na Ye, ete Azalaki Masiya. Mwasi ya litangá ya makila ayébaki Ye, Liloba.

135 Baebale 4:12, Biblia elobi ete: “Liloba na Nzambe ezali na nguya koleka mopangá ya mino mibale, Esósólaka makanisi oyo ezali na motema,” (bato boni bayebi yango?) “na molimo.” Yango nde eloko oyo Liloba ezali. Bondimi ete Azalaki Liloba? Bondimi

ete Azali motindo moko lobi, lelo pe libéla? Likambo esili nye, soki bondimi Yango.

<sup>136</sup> Bótala, elenge mwasi yango alobaki: “Soki nakoki bobele kosimba Ye! Ata bato balobi boni mpo na Ye, etali ngai te. Ngai nandimi ete Azali mpenza oyo Alobaki ete Azali. Soki nakoki kosimba Ye, nakoyóka malamu.” Na bongo, amifungolaki nzela pe asimbaki Ye. Azongaki na eyanganelo.

Yesu atelemaki pe alobaki: “Nani asimbaki Ngai?”

<sup>137</sup> Pe Petelo amekaki komóna Ye lokola motó moko abeli libóma, alobaki: “Ee, bato nyonso! Kolobaka makambo ya boye te, ee, bato bakobanda komituna mituna mpo na Yo. Moto ya lokumu lokola Yo, na sima óloba: ‘Nani asimbaki Ngai?’ Bato nyonso bazali kosimba Yo.

<sup>138</sup> Alobaki: “Kasi Nayoki ete Nalembi, nguya ebimi kati na Ngai.” Ayébaki ete likambo moko esalamaki!

<sup>139</sup> Sikawa bótala, bótala likambo elandaki, likambo ya kokamwa makasi. Atambwisaki miso kino Amonaki ye, pe Ayebisaki ye likambo na ye, kondima na ye ebikisaki ye. Azalaki. . . Ayébanaki lokola Liloba na Nzambe, ayebaki bausekele ya motema. Oh! la la! Liloba esósólaka nzóto, esósólaka motema.

<sup>140</sup> Sikawa bózela naino, mpo na kosilisa. Sikawa, lokola Baebele 13:8 ezali sóló: “Azali motindo moko lobi, lelo pe libela,” bondimi Yango? Sikawa nakotika makambo mingi oyo nasengelaki koloba awa. Na boye, ezaleli na Ye ekotalisa Ye sikawa na ntango tozali awa, soki Azali motindo moko lobi, lelo pe libela, lokola Azalaki na eleko wana. Ezali solo? Alakaki yango. Pe, bómikanisela, elembo na Ye ezali kotalisama na Ye. Bato boni bazali kosósóla yango, bótómbola maboko. Elembo na Ye ezali kotalisama na Ye.

<sup>141</sup> Lokola baoyo bautaki na Emaus, nakoloba boye. Yesu asilaki kobakama na ekulusu. Bango nyonso bazalaki na mawa. Bautaki na nkunda, bongo bato balobaki: “Moto moko ayáki koyiba Ye.” Mokolo moko Abimaki pwasa na lisobe pe Atambolaki elongo na bango, lokola Azalaki kokende na Emaus. Pe balobaki. . .

Alobaki: “Mpo na nini bozali—mpo na nini bozali na mawa boye?”

Alobaki: “Ee, Yo ozali mpenza mopaya awa.”

<sup>142</sup> Na sima, ntango Amemáki bango na kati, Asálaki likambo moko lokola Asalaki yango liboso ya kobakama na Ye na ekulusu. Ezalaki elembo na Ye ya kosala yango bongo. Pe mbala moko basósólaki, na elembo na Ye, ete ezalaki Yesu yango moko oyo asilaki kobakama na ekulusu. Amen.

<sup>143</sup> Nzambe asekwisaki Ye longwa na bakufi, pe lelo elembo na Ye, ndenge moko, motindo moko ezalaki na eleko wana! Pe kozongisama ya mikolo ya Sodoma, ndenge Yesu asakolaki,

likambo yango moko esengeli kosalema “ntango Mwana akomonisama na bato”. Ezali kotalisama ya elembu na Ye. Baebele 4:14 pe 15: “Azali sikawa Nganganzambe Mokonzi na biso oyo akoki koyoka mawa mpo na bolembu na biso, ndenge Azalaki na eleko wana.” Bondimi yango? Bolembu na biso epesaka Ye mawa. Ee, soki epesi Ye nawa, Akosala ndenge nini soki Azali motindo moko lobi, lelo pe libela? Elembu na Ye ekozala motindo moko. Na bongo, Akosala lokola Asalaki ntango mwasi wana asimbaki elambá na Ye. Bondimi yango? Azali na bomoi libela, Azali libela na bomoi, pe bilembu na Ye ezali kotalisa Ye kino lelo, ndenge Azalaki na eleko wana. Bondimi yango na motema na bino mobimba? Nzambe ayébanaka na elembu na Ye, etalisaka Ye.

Tógumba mitó na biso.

<sup>144</sup> Tata na Likolo, tozali bobele mibali pe basi, oyo bafandi awa na mpokwa oyo. Kasi, tozali, ndenge ezáláká, komaniola Nzambe ntango tomaniolaka Liloba. Pe, Tata, nakobanga komeka koloba likambo moko oyo ezali awa na kati te. Nakobanga komeka kopésa ndimbola na ngai moko na Yango, mpo ekoki kozala libunga. Pe Olobaki: “Moto nyonso akolongola Liloba moko kati na Yango, to akobakisa liloba moko likolo na Yango, eteni na ye ekolongolama na Buku na Bomoi.” Litomba nini ekozala na bomoi na ngai, nan tango wana, Nkolo, soki nasali likambo mabe ya ndenge wana? Bongo, nalobi Yango ndenge Ezali.

<sup>145</sup> Pe, Tata, Olakaki ete Okotalisa Yango polele. Nandimi ete Osilá kosekwa longwa na bakufi, eleki mibu nkóto mibale, pe Ozali na bomoi na mpokwa oyo, mpo na kobenga bato na pamba oyo, ndenge Osalaka ntango nyonso, moko *awa* pe moko *kuna*; bitóngá te, bibongiseli te, makambo minene te oyo moto asilá kosala. Kasi Olobaki ete Okozua libota moko kati na bato na Mabota, libota moko: “Bato mibale na elanga; Nakotika moko, Nakozua moko. Bato mibale na mbeto; Nakotika moko, Nakozua moko,” libota moko awa pe kuna, mpo na Nkombo na Yo, Mwasi-na-libala.

<sup>146</sup> Nandimi ete ezaleli na Yo etalisaka Yo. Olakaki: “Ndenge esalemaki na mikolo ya Sodoma,” ekosalema pe bongo na mokolo oyo Okomonisama, Liloba. Liloba ya ntango oyo, Yango moko, esengeli komonisa Liloba Yango moko, ndenge Liloba eyaki na basakoli. Pe, Tata, tomoni Yoane, ezalaki ye awa na mokili, pe li—Liloba oyo azalaki komonisa ezalaki kuna. Pe Biblia elobi: “Liloba eyáka ntango nyonso na mosakoli.” Pe Liloba ekómaki nzoto na ntango wana, na bongo, Etambolaki sémba kino na Yoane, na kati ya mai. Liloba eyaki na mosakoli.

<sup>147</sup> Tata, Nzambe, yáká na mpokwa oyo, nabondeli, mpo na kosunga biso. Sunga kozanga kondima na biso. Limbisa biso bozangi na biso. Bikisa babéli pe bato na mawa. Liloba moko

longwa na Yo, Nkolo, ekozala na ntina mingi, koleka nyonso oyo moto akoki koloba. Bobele Yo óloba, Tata, bobele Liloba moko ekozala na ntina mingi. Sikawa, Ozali motindo moko lobi, lelo pe libela. Tomipesi na Yo sikawa. Pe tobondeli ete, ntango tokokende mpo na kozonga na ba-ndako na biso na mpokwa oyo, tóloba lokola baoyo bautaki na Emaus, ntango bamonaki Ye kosala likambo moko mpo na kotalisa bango ete Azalaki Nkolo oyo asekwaki. Ata bato balobaki boni: “Bayibaki nzoto na Ye, pe—pe basalaki *boye* na *boye*, to *boye*” bango bayebaki mpenza ete Asilaki kosekwa longwa na bakufi. Na mpokwa oyo, Okolinga te na pokwa oyo komitalisa lisusu ete Ozali na bomoi mpo na biso, pe kobénga, mpo na Yo, bato ya engumba kitoko oyo pe baoyo ya nzinga-nzinga, baoyo babongisámá mpo na Bomoi. Mpo tosendi yango na Nkombo na Yesu. Amen.

<sup>148</sup> Sikawa, nakosenga bino sikawa, na miníti pene na zómi na mitano. Tokosilisa na miníti pene na zómi sima na ntango. Nakosala nokinoki. Nalingi kobenga ba-kalati ya mabondeli. Nakanisi ete Billy . . . G, ba-kalati ya mabondeli G, yango nde bakabolaki? G, ba-kalati ya mabondeli G, tókomata moko kino zómi na mitano to ntuku mibale, ndenge wana. G, moko. Bato boni . . . Nani azuaki G, motángo ya liboso, tómbola loboko, mpo tóyeba soki azali awa. [Maloba mazangi na eteni ya bande—N.D.E.] Pe, bómikanisela, bósimba ba-kalati na bino ya mabondeli, tokobóndela mpo na bino. Soki ozwi yango na mpokwa oyo te, tokotala likambo yango. Moko, mibale, misato, minei, mitano, motoba, nsambo, mwambe, libwa, zómi, bóya awa nokinoki mpenza, bóya kino awa pe bókota na molongo. Malamu. Moko, mibale, misato, minei, mitano, motóba, nsambo. Misato bazangi kuna. Nsambo, nsambo, pe moko, mibale, misato. . . Roy, tángela ngai bango. Malamu, zómi. Malamu, moko kino zómi. Zómi na mitano sikawa, G, moko kino zómi na mitano, elingi koloba zómi na mit- . . . to zómi, zómi na moko, zómi-na-mibale, zómi na misato, zómi na minei, zómi na mitano. Malamu. Tó—tósuka wana, ná baoyo. Malamu.

<sup>149</sup> Sikawa tozali—tozali komeka kotósa maloba na biso, bomoni, kobima liboso na ngonga ya libwa na ndambo, kasi tokosala yango te na mpokwa oyo, na—na—nayebe. Kasi sikawa nalingi ete bino nyonso bólanda na bokebi nyonso.

<sup>150</sup> Sikawa, soki nalobaki Sóló, pe naye bisaki bino ete makambo oyo esengeli kosalema, pe yango oyo na Biblia, ete oyo nde ngonga yango. Bokokaki kolakisama na eteyelo mosusu. Ezalaki pe bongo na Bafalisai. Kasi Biblia elobáki, na eleko wana: “Mongondo akokumba zemi,” Ye. . . Esalemaki. Alobaki ete bilembo ya Masiya ekozala *bongo*. Esalemaki. Kasi bandimaki Yango te. Makambo yango epekisaki Ye te kokende liboso ndenge moko. Ezali ndenge moko sikawa. Tozali kobika na ba-ngonga ya suka ya mokolo ya suka.

<sup>151</sup> Bato-na-zebi balobi ete etikali miníti misato liboso na minuít. Nakanisi ete ngonga ekómi mosika koleka sikawa, koleka ntango mosusu nyonso. Communisme esili komikotisa na ekólo, pe batéi bazali kolobela mingi communisme esika ya koloba mpo na Klisto. Ezali komonana lokola bazali koluka kokweisa yango, mpo na nini kozanga komona ntango tozali kobika na yango? Communisme, tozali te na... Oh! la la! Nazali kobanga communisme te. Likambo ezali ete Boyei na Nkolo ekokuta bino bomilengeli te, lingomba. Sikawa tika été moto nyonso, tika été Amerika mobimba ézongela Nzambe, bokomona likambo nini ekokómela communisme. Bosengeli koyeba bokono, liboso ya kopesa nkisi.

<sup>152</sup> Sikawa, moto nyonso ázala na limemia, nasengi na bino ete bótambola-tambola te. Sikawa, bato boni bazali kuna bazangi kalati ya mabondeli, pe bolingi ete Nzambe ábikisa bino, bótombola mabóko, bóloba: “Na—na—na—nazali kondima.” Ata ozali esika nini.

<sup>153</sup> Sikawa bótala, nakanisi *oyo* ezali kosala, [Ndeko Branham abeti pe afuli na micro—N.D.E.] *oyo*. Malamu. Soki ozali na... Awa na sima bozali koyoka ngai? Malamu. Malamu. Sikawa bótala yango, Ndeko Roy.

<sup>154</sup> Sikawa, Liloba moko longwa na Nzambe ezali na ntina mingi koleka nyonso ngai nakoki koloba.

<sup>155</sup> Sikawa, kotala longwa na awa, ezali mpasi, e—ezalaka ntango nyonso bongo. Bomoni, miinda ezali kobeta mbala moko na elongi, pe ezali mwa mpasi mpo na komona kuna, mpo na komona bato.

<sup>156</sup> Pe nayebi te. Nakoki komona mpenza moto moko te, oyo nayebi, na baoyo nakoki komona sikawa. Bato boni kati na bino nayebi bango te, bótombola maboko, baoyo bayebi ete nayebi makambo na bango ata moke te. Nabanzi ezali bisika nyonso. Bato boni, na molongo ya mabondeli, bayebi ete nayebi makambo na bango ata moke te, bótombola maboko. Na molongo ya mabondeli nyonso oyo kuna, soki bokoki koyoka ngai, bótombola maboko soki—soki nazali mopaya. Bango nyonso.

<sup>157</sup> Sikawa Azali nani? Azali Nganganzambe Mokonzi oyo akoki koyoka mawa mpo na bolembu na biso. Mwasi oyo asimbaki elamba na Ye, ntango mosusu ye pe azalaki na kalati ya mabondeli te, kasi asimbaki Ye pe, ntango asalaki yango, likambo moko esalemaki. Sikawa bósimba ndenge moko, bósimba Ye. Bato boni bayebi ete Baebele, mokapo ya 4, elobi: “Sikawa Azali Nganganzambe Mokonzi oyo akoki kosimbama na bolembu na biso”? Bato boni bayebi yango? Ee, Akosepela kotalisa elembo yango moko na Ye, boye te? Soki Azali motindo moko lobi, lelo pe libela, Akosala. Malamu. Sikawa, oyo nde...



158 Ndeko Peary, yáká na bango epai na ngai. Sikawa nalingi ete moto nyonso ázala na limemia mpenza. Awa mpenza, awa mpenza, ndeko mwasi.

Sikawa, bokoki koyoka ngai? Sikawa, nayebi te. Botala malamau, moto oyo azali kuna, in—ingenieur, mpo nayebi te lolenge nini.

159 Emononeli. Sikawa, bómikanisela, ngai nazali Masiya te, nazali Klisto te. Kasi Azali awa. Yango nde likambo nazali komeka komema bino komona, Azali awa, Azali kokokisa Liloba na Ye.

160 Sikawa, soki mwasi oyo azali na bokono, nayebi te. Nayebi ye te. Azali mokóló koleka ngai. Ntango mosusu tobótámá na mibu ekeseni, pe na ntáká ekeseni, oyo nde mbala na biso ya liboso ya kokutana.

161 Sikawa, ezali lokola ntango Nkolo na biso akutanaki na mwasi moko, na Santu Yoane 4. Nazali koluka kokómisa yango mpenza polele mpo bózanga komona yango te, na bongo, na Ngwendé ya Kosambisama, nakozala na makila na maboko te, mokolo wana. Sikawa, Yesu alakaki ete na mikolo ya suka likambo oyo ekosalema lisusu. Ndenge tozozala mpóso mobimba, bokosósóla yango. Ezali elaka.

162 Sikawa, nayebi mwasi oyo te, oyo ezali mobali moko ná mwasi moko bakutani mbala ya liboso. Sikawa, soki Nkolo Yesu amonisi ngai ntina nini ozali awa, to moto mosusu, to likambo nini ozali kosala, to likambo nini ezali kotambola malamau te kati na yo, to likambo nini osilá kosálá, soki ezali likambo ya mbongo, ya libóta, ata ezali likambo nini, esengeli kouta na Nguya moko eleki-likolo, mpo ngai nayebi yo te. Bato boni bakotatola yango, esengeli koya na nzela na Nguya moko eleki-likolo? Sikawa, okoki kosakana lokola Bafalisai, koloba ete ezali . . . (Ngámbo mosusu, Ndeko Roy, omoni.) Okoki kosakana lokola Bafalisai, pe koloba: “Ezali molimo mabe,” bato mingi balobaka bongo. Ezali likambo na yo ná Nzambe, na ntango wana. Na bongo okozua mbano na bango. Kasi soki olobi: “Ezali ya Nzambe,” na ntango wana okozua mbano na Ye. (Sikawa, ebongi mwa moke. Matondi.)

163 Sikawa tálá ngai mwa moke. Ndenge Yesu alobaki . . . Ndenge Petelo ná Yoane, ezalaki bango koleka na ekuke ebengami Kitoko, balobaki: “Tálá ngai.” Na—nayebi yo te. Kasi sikawa soki Molimo Mosantu, Moto mosusu, libanda na ngai, ayei komonisa likambo nini ezali na motema na yo, na bongo, Biblia elobi: “Liloba na Nzambe ezali na mopotu koleka mopangá ya mino mibale, Esósólaka makanisi, mikano ya motema.” Ezali mpenza yango nde Biblia elobi. Sikawa, yango emonisaka nde sekele ya motema. Sikawa, ekozala elembo ya Nzambe, Liloba oyo etalisami polele na eleko oyo. Bato

boni bandimi yango sikawa? Malamu. Ah-ha. Sikawa bomoni likambo nini yango ezali?

<sup>164</sup> Sikawa, nasili kotea yango, nayebisaki bino yango, kasi ezali nde sóló? Yango nde likambo elandi, bomoni. Sikawa, soki ezali sóló, bino nyonso. . . Soki ezali sóló te, ye akoyeba yango. Na bosóló, akoyéba yango. Bino pe bokoyéba yango. Kasi soki ezali sóló te, na boye, na—na—napesaki litatoli ya lokuta mpo na Klisto. Soki ezali Sóló, moko na moko na bino, bosengeli kopesa Ye mitema na bino, bosengeli kondima Ye na motema na bino mobimba, pe kotómbola loboko mpo na koyamba Ye mpo na bosénga nyonso bozali na yango. Ya solo.

<sup>165</sup> Sikawa, tika ete Molimo Mosantu ámitalisa Ye moko, na Nkombo na Yesu Klisto. Sikawa, nayebi ata moke te ntina nini ozali awa. Ozali komonana lokola mwasi malamau, mama malamau, ndenge otelemi wana, pe yango nde nyonso nayebi mpo na yo. Kasi Molimo Mosantu akoki komonisa ntina nini ozali awa, eloko nini ezali kotungisa yo, to eloko moko. Okoyéba soki ezali sóló to te. Sikawa, ozali, ntina oyo olingi libondeli mpo na yo, ezali likambo moko lokola misisa na elongi na yo. Ezali lokola bokono ya misisa, na elongi na yo. Sikawa, soki ezali sóló, tombola loboko. Ondimi?

Sikawa, bokoki koloba: “Abánzi yango bobele kobánza.”

<sup>166</sup> Sikawa, azali moto moko malamau. Sikawa, tálá naino awa, ndeko mwasi. Nayebi te likambo nini Ayebisaki yo. Kasi ata ezalaki nini, ezalaki sóló. O, ozali nzeneneke na yango sikawa, boye te? [Ndeko mwasi alobi: “Ezali sóló.”—N.D.E.] Ezali sóló. [“Eleki mibu ntuku mibale.”] Oh! la la! Ondimi ete Nzambe akobikisa yo na yango? Sikawa, oyebi ete Ezali Bozali na Ye, Eloko moko ezali awa, eyebi yo, Eloko moko. Ndenge Yesu alobaki na mwasi wana, Ayebaki esika nini mpasi na ye ezalaki, sikawa Ayebaki esika nini mpasi na yo ezalaki.

<sup>167</sup> Pe ezali komonana lokola ozali na mokumba mpo na moto mosusu. Ezali ya yo. . . Ezali mobali, ezali mobali na yo. Azali pe awa. Ezali solo. Pe—pe ondimi ete Nzambe akoki komonisa ngai mpasi ya mobali na yo? [Ndeko mwasi alobi: “Iyo, nandimi.”—N.D.E.] Mobali yango azali kobela makasi, azali na mitungisi na nzoto. Eloko moko oyo ezali kotungisa ye, ezali bokono ya motema. Azali na bokono ya motema. Soki ezali sóló, tómbola loboko. [“Ezali solo.”] Azali pe na lingúndu. [“Ezali solo.”] Ezali sóló. Bomoni? Ezali sóló? Iyo. Motema likolo-likolo mpenza, iyo, motema likolo-likolo mpenza. Ezali ya sóló, boye te? [“Iyo.”]

<sup>168</sup> Soki Yesu amonisi ngai! Ayebisaki Petelo nani ye azalaki. Soki Amonisi ngai nani yo ozali, okondima ete ezali Ye? [Ndeko mwasi alobi: “Iyo.”—N.D.E.] Ofandaka awa te. [“Te.”] Outi na esti ya awa, outi na Louisiana. [“Ya solo.”] Ezali solo. Ya solo. Pe nkombo na yo Mme Coleman. [“Ezali solo.”] Zóngá na ndako, Yesu Klisto abikisi yo. Kondima na yo epesi yo lobiko na nzoto.

169 Sikawa bódima. Bondimi na motema na bino mobimba? Yesu Klisto azali komitalisa Ye moko na lisekwa na Ye! Bomoni likambo nini nalingi koloba? Sikawa, moto nyonso oyo azali na makanisi malamau ayebi ete moto ata moko te akoki kosala yango.

170 Sikawa, bino bozali kuna, bóloba na Nzambe boye: “Na—na—nayebe ete moto yango ayebi ngai te, sikawa nazali kobondela mpo na eloko moko. Nkolo, nakoki pe kosimba elamba na Yo? Soki ezali bongo, na boye, Ómitalisa Yo moko na lisekwa na Yo. Balúká, tika ete násimba Yo, na sima, Óloba na ngai na nzela na ye.” Bokomona likambo nini ekosalema. Bómeke bobele komeka.

171 Mbote, misie. Okoki kobéléma mwa moke, pembeni awa? Bato mosusu bazali sima na yo kuna, omoni.

172 Makambo nyonso sikawa, ezali, milimo na bino nyonso—nyonso, ekómi lokola koningana. Okoki kosimba yango, bomoni, pe koyeba makanisi na bango, pe ekómi, bomoni, ezali koyebana malamau te.

173 Ondimi ete nazali mosali na Ye? Ondimi ete Klisto akoki komonisa ngai ntina nini ozali awa? Mikanisela, mokolo moko, tokokutana na Ngwende ya Kosambisama, pe tokosamba mpo na likambo ya mpokwa oyo. Oyebi yango malamau? Mpasi na yo, moko na yango, ezali na mokongo na yo. Ozali na ba-mpasi mingi. Ozali na mpasi ya mokongo. Pe miso na yo ezali kokufa, ozali na mpasi ya miso. Soki ezali solo, tómbola loboko. Sikawa, osalaka pe likambo moko oyo olingaka kotika yango. Ezali mabe te mpo náloba yango? Olingi kotika komela makaya. Pe—pe eloko mosusu, ozalaki na . . . omonaka ete yango nde eloko epekisaka yo koyamba Molimo Mosantu. Sikawa olingi koyamba Molimo Mosantu, ezali mposa moko na motema na yo. Ezali solo, pepá maboko na yo *boye*. Ee, esili kotika yo sikawa, kendé, yambá Molimo Mosantu, pe bikisama. Nzambe ápambola yo, misie.

174 Bondimi? Sikawa, nasengi na bino ete bózala mpenza na limemia. Sikawa, ngonga ebandi koleka mingi, bófanda kimia mwa moke.

175 Mbote. Ngai ná yo toyebani te. [Ndeko mwasi alobi: “Iyo.”—N.D.E.] Nkolo Yesu ayebi biso mibale. Sikawa kobanga te, omoni, okómi lokola . . . Omoni, kitisa motema, Ezali Bozali na Ye. Omoni, ezali yango. Ezali Bozali na Ye. Sikawa okómi komiyoka mpenza ndenge, ndenge mosusu, okómi na mwa bopolo, komikitisa. Omoni? Sikawa, kotelema liboso na moto ekosala te ete ómiyoka bongo.

176 Bato boni basilá komona Pole wana, Likonzi ya Póle, ya Móto wana? Bakangaki Yango fotó awa na Texas, mbala ya liboso, mbala ya mibale. Etelemi mpenza pembeni na mwasi oyo, bomoni, na mosándá oyo sikawa. Ekokaki kozala malamau soki bino . . . soki bokoki komona.

177 Ntango bo . . . bótika koningana, yango nde esalaka bongo, bomoni. Lobi na mpokwa tokosala molongo ya mabondeli kobanda na ngonga ya libwa, bomoni, na—nazali koumisa bino mingi. Na bongo, tózua mwasi moko oyo. Bózela naino.

178 Ondimi, oyo afandi kuna? Iyo, mpo na bolembu oyo ozali kotungisama na yango, yango nde likambo ezali kotambola te. Bomoni? Asimbaki nini? Nayebi mwasi yango te. Asimbaki Nganganzambe Mokonzi. Kasi, bomoni, napesaki ye mokongo, lokola esalemaki na ntango ya Abalahama. Awa, tálá naino ngámbo oyo, ndeko mwasi. Ezali komonana lokola ozali na mokumba na motema na yo. Ezali bongo. Ezali mwana na yo ya mwasi oyo kuna na sima. Azali na mpasi na matoi na ye. Ezali solo. Ondimi sikawa na motema na yo mobimba? Malamu, sikawa, ndima bobele kondim, pe akoyóka malamau.

179 Bomoni likambo nalingi koloba? “Soki okoki kondima, makambo nyonso ekosalema.” Bondimi?

180 Ezali na elenge mwasi moko kuna na sima akitisaki loboko, azali mpenza kotálá ngai. Azali na bokono ya sukáli. Ondimi ete Nzambe akobikisa bokono yango ya sukali, yo oyo ofandi kuna? Malamu, na boye, okoki kozua eloko osengi. Ndimá se kondima.

181 Mwasi oyo azali kuna, pembeni na yo, azali na mpasi na mosópó ya monene pe ebombelo ya masúba. Ondimi ete Nzambe akobikisa yango, akosilisa yango? Malamu, okoki kozua eloko osengi. Loboko ya elenge mwasi wana. Bomoni, sikawa bótala, bótuna ye, Eloko moko ya bopolo mpenza esimbaki ye. Bomoni, kondima na ye, yango nde ezali kosala yango. Ezali ngai te. Ezali Nzambe.

182 Awa, botala mobali moko afandi awa, na suka. Azali na mpasi ya bronchite, mobangé oyo afandi awa pe azali kotala ngai. Misie, ondimi ete Nzambe akobikisa yango? Ye oyo afandi pembeni na yo azali na bokono ya infection na nzoto na ye. Ezali solo, ndeko mwasi, pepá moswále na yo soki ezali solo. Malamu. Malamu, bino nyonso, bótia maboko bamoko likolo na bamosusu, bóndima na mitema na bino mobimba. Tata ná mwana-mwasi, bongo mpo na nini te? Bótia maboko bamoko likolo na bamosusu pe bóndima na motema na bino mobimba, Yesu akobikisa bino.

Na—nabeti móndegé na kondima na bino, bóndima yango!

183 Mwasi oyo afandi sima ya mobali yango, kuna, azali na mpasi na líkundú. Madame, ondimi ete Nzambe akobikisa yo? Yango nde mpasi na yo. Soki ezali solo, téléma mpo bato bákoka komona. Bomoni? (Bazali kosimba nani kuna?) Hé, namikosi te, oyo wana mama na yo, oyo afandi pembeni na yo, kuna. Azali na infection na misopó na ye. Madame, ondimi ete Nzambe akobikisa yango? Yo pe téléma, pe bikisama.

184 Bondima! Azali motindo moko lobi, lelo pe libela. Amitalisaka Ye moko. Bondimi ete nazali mosakoli, to mosali na Ye? Ebetisaka bato libaku, koloba “mosakoli”, basosolaka te.

185 Botala awa. Ondimi na motema na yo mobimba? Ozali na mpasi makasi ya motema likolo-likolo. Ondimi ete nakoki koyebisa yo eloko nini esalaki yango? Ozuaki likama ya motuka. [Ndeko mwasi alobi: “Ezali solo.”—N.D.E.] Ezali solo. Ezali solo, likama ya motuka, pe ezokisaki yo na mokongo, kino na lipeka. Ezali solo? Ekotika yo sikawa. Ezali pe likambo ya ménopause oyo ezali kotungisa yango, kopesa yango mobulu, kasi okoyoka malamau. Kende, ndima na motema mobimba. Yesu Klisto akobikisa yo, soki ondimi. Amen.

186 Ondimi? Ondimi ete Akoki kobikisa mingai? Ee, na bongo, kóba kotambola, Akobikisa yo.

187 Bato boni bandimi na motema mobimba, báloba: “Nandimi mpenza na motema na ngai mobimba?” “Soki okoki kondima!”

188 Bondimi ete Abikisaka bokono ya sukali pe bato bakomaka malamau, bato ya na sukali ya diabete, Abikisaka bango? Bondimi yango? Bókoba kotambola, koloba: “Nkolo, natondi Yo mpo na yango.” Bóndima na motema mobimba, pe bokobika.

189 Bato boni bandimi kuna sikawa, na motema mobimba? Te, bomoni, bozali kotambola-tambola, bozali kotungisa Yango, baninga. Bóyoka ngai, bato boni bandimi? Bótombola loboko, bóloba: “Nandimi na motema mobimba.”

190 Sikawa nakosenga bino kosala eloko moko. Sikawa, soki Yesu akokisi Liloba na Ye, pe bondimi Yango, pe atalisi bino yango polele, Yesu, na etinda ya suka na Lingomba na Ye, alobaki pe boye: “Bilembo oyo ekolanda baoyo bakondima.” Sikawa bato boni bandimi? Alobaki: “Soki batieli babeli maboko, bakobika.” Bondimi elaka yango? Na bongo, bótiela maboko na moto oyo azali pembeni na bino.

191 Soki Abikisi yo te, okokufa. Ozipami na elilingi. Kasi Yesu Klisto abikisi yo. Ondimi yango? Malamau, tia . . . kende liboso, ndima sikawa, pe okobika.

192 Yaka, madame. Ondimi ete Nzambe akobikisa mókóti yango ná bokono ya sukali wana, pe Akobikisa yo? Zua . . . Malamau, kende, ndima na motema na yo mobimba, pe bikisama.

193 Kobondela, bozali kobondela bamoko mpo na bamosusu? Bótielana maboko, tóbondela biso nyonso elongo. Bino nyonso bótielana maboko. Ngonga esili koleka. Bótielana maboko, pe tóbondela.

194 Nkolo Yesu, tondimisami mpenza ete Nzambe amitalisaka Ye moko kati na libota na Ye. Bilembo na Ye, lokola motindo moko lobi, lelo pe libela, emitalisaka yango moko. E Nkolo Nzambe, Yo Oyo opesaki elaka ya Liloba, Olobaki: “Bilembo oyo ekolanda baoyo bakondima. Soki batieli babéli maboko, bakobikisama.”

Bato oyo basili kotatola ete bazali bandimi, bandimi ya Yesu mosekwi, Oyo azali komitalisa Ye moko sikawa, na elembo yango moko na Ye, oyo Azalaki ntango Azalaki awa na mokili, kosala ete Makomi ézala mpenza Solo, ete Azali motindo moko lobi, lelo pe libela. Nkolo Yesu, elongo na bandimi oyo batii maboko bamoko likolo na bamosusu, liboso na Bozali na bo-Nzamb ya Mwana na Nzambe mosekwi oyo atalisami polele, Oyo akómi lisusu nzoto kati na biso na mpokwa ya lelo, na nzoto ya bandimi na Ye, napesi mitíndo na molimo nyonso ya mbindo, na bokono pe mpasi nyonso, ete bábima na bato oyo, lokola bandimi oyo batii maboko bamoko likolo na bamosusu. Na Nkombo na Yesu Klsito, tika ete ésalema bongo.

<sup>195</sup> Baoyo nyonso bakondima kobikisama na bango sikawa, baoyo bandimi yango sika-sikawa, na Bozali etalisami ya Mwana na Nzambe mosekwi, bóndima ete bosenga na bino esili kopesamela bino, pe ekotalisa likambo yango moko, bótelema pe bóloba: “Nayambi yango na motema na ngai mobimba.” Bótelema, bino nyonso, liboso na Bozali ya Yesu Klisto, baoyo bakondima. Bókumisa Ye! Bópesa Ye nkembo pe lokumu. Bótombola maboko pe bópesa Ye matondi. Nzambe akokokisa bilaka nyonso oyo Apésáki.



*NZAMBE AYÉBANAKA NA BILEMBO NA YE* LIN64-0311  
(God Is Identified By His Characteristics)

Liteya oyo ya Ndeko William Marrion Branham, eteyamaki liboso na Ngelesa mokolo mwa misato na mpokwa, mokolo ya 11, sanza ya misato, na mobu 1964, na Salle Municipale ya Beaumont, Texas, U.S.A., ekamatamaki uta na bande pe ekomamaki mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

**VOICE OF GOD RECORDINGS**  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)